

**Date – 16/10/2024**

**Time - 18:30 -18:40Hrs**

## **REGIONAL NEWS BULLETIN**

### **HEADLINES (EVENING)**

- 1. Chief Minister Pu Lalduhoma kaihhruiin CMO Cabinet Room ah Council of Ministers Meeting neih mek a ni.**
- 2. Central YMA chuan dan hnuai Learner leh Driving Liscence nei theilo pe chhuak thintu mi thenkhatte leh District Transport Officer (DTO) a thawktute an chhui chhuak vek tawh an ti.**
- 3. Prime Minister Narendra Modia hova Union Cabinet thukhawm chuan central hnuai sawkar hnathawk leh pensioner-te DA chu zaa pathumin a tipung.**
- 4. National Conference Leader Omar Abdullah chu vawiin khan Jammu and Kashmir Union Territory Chief Minister hmasa ber atan lakluh a ni.**

**<><><>**

### **COUNCIL OF MINISTERS MEETING**

**Chief Minister Pu Lalduhoma kaihhruiin CMO Cabinet Room ah Council of Ministers Meeting neih mek a ni a,**

**Council of Ministers Meeting thukhawm hian sorkar thu pawimawh dang zingah petrol/diesel a chhiah tihpun tawh tihlem leh chungchang an ngaihtuah dawn ni a thudawn a ni a, an thuchhuak ngaihchan mek a ni.**

**<><><>**

### **MSCW CHAIRPERSON**

**Mizoram State Commission for Women (MSCW) Chairperson atan Pi C. Zodinpuii, Durtlang chu ruat a ni a, Mizoram sorkar, Social Welfare & Tribal Affairs Joint Director hlui a ni.**

**Pi C. Zodinpuii hi thiamna lamah MSW, (Family & Child Welfare Specialization), TATA Institute of Social Sciences, Mumbai atanga zir zo a ni a. Sawrkar hna a thawh laiin Social Welfare Department hnuai hna hrang hrang - Case Worker, Remand Home Superintendent, Residential Institute Training Centre (RITC), Durtlang ah te lo awm tawhin, Directorate of Social Welfare & Tribal Affairs-ah Joint Director in nikum December ni 31 khan pension in a chhuak a. Pi C. Zodinpuii hi Protection of Women from Domestic**

Violence Act, 2005 ah Master Trainer a nih bakah Protection Officer in a lo awm tawh bawk a ni.

Puan tawh angin thla hmasa ni 7 khan khatihlaia MSCW Chairperson Pi C. Lalchhandami chu eptu party leh zirlai pawlten bang tura an nawr avangin banna a thehlut a. LarsAp chuan Chairperson tur ruat a nih hmaa Chairperson hna lo thawk lailawk turin Commission Member ni lai Pi K. Lalremruati a ruat a. Vawiin khan Chairperson atan Pi C. Zodinpuui ruat a nih thu hi Mizoram sorkar chuan a puang a ni.

<><><>

## CYMA

Central YMA chuan dan hnuai Learner leh Driving Licence nei theilo pe chhuak thintu mi thenkhatte leh District Transport Officer (DTO) a thawktute an chhui chhuak vek tawh an ti.

Central YMA hruaitute hian an President Pu Lalhmachhuana hovin vawiin khan Transport Minister Pu Vanlalhlana an kawm a, tun hnai hun engemaw chen kalta atang khan, mi thenkhatte leh raltlan thenkhat ten Driving License awlsam taka an nei mai thei thin chu chhui chiangin, mi engemaw zat an kawm chiang a. Heta an thil hmuh chhuah chu, Mizoram mi leh sa dik tak zinga mi thenkhatte leh DTO a thawktute inthuralin, danin a phut anga Learner & Driving Licence nei thei tura lehkha pawimawh thil tel ngai nei lo te hnenah Learner & Driving Licence pekchhuah a ni ngei tih an finfiah thu an sawi a ni.

CYMA hruaitute chuan Learner & Driving Licence siam duh te chuan hetiang siam theia in sawi Commission ho hnenah document engmah pek ngai lovin an an inchhiar zat sum tam tham deuh zawk an pe a, an ni hian Aizawl DTO-a thawktute hnenah pawisa chawi ngai aia tam pe ve leh in, an lo siam sak thin a ni an ti a, hetiang pawn lam mi Learners leh Driving Licence siam sak thei tuten Department lama thawktute pawisa an pe tih finfiahna pawh Central YMA hruaitute hian Minister hi an hlan vek a ni.

Hetianga thil diklo ti thin DTO pisa chhunga thawktu te leh pawnlam atanga commission lo ti thin office lam thurualpui tu te hi Central YMA chuan an hrechhuak vek tawh tih Minister hi an hrilh a. Mizoram khawpui ber, Aizawla DTO in hetiang an tih theih chuan District dangah pawh hlauhthawn an neih len viau thu Central YMA hruaitute hian an sawi bawk a ni.

Central YMA in hemi chungchanga hmalak sak tura Minister an ngenna lehkhaah hian, a enkawl Transport Dept. hnuai dik lo taka Learner & Driving Licence pekchhuaha inhnawnawihthe chu dan anga na taka hrem tur leh dan in a phut documents engmah nei lo leh Driving Test pawh paltlang miah lova, Driving Licence pek chhuah mi engemawzat chu cancel leh sak tur leh, tun hnuai hetiang a thlen tawh loh nana rang taka hmalaksak turin an ngen a ni.

CYMA hruaitute hian ruihhlo phur thin Maxi Cab leh Public Carrier te ruihhlo an phurh nen a man te chu an public carrier license cancel thin tur te leh hnamdang motor, state dang registration nei passenger phur tur nilovin Mizoram hmun hrang hrang passenger phura an tlan thin chungchang te leh Lirthei neituten Garage nei vek tur anih chungchangah khauh zawk a kalpui tura ngenna an thlen tel bawk a ni.

<><><>

CM

Chief Minister Pu Lalduhoma chuan paramedical science zirna RIPANS in harsatna a tawh mek, a bik takin zirtirtu indaihlohna chu theihtawp chhuaha a ngaihtuahpui dawn thu a sawi.

Vawiina Regional Institute of Paramedical & Nursing Sciences (RIPANS) in Baptist Centre, Falkland-a 24th Graduation & Lamp Light Ceremony a buatsaih a hmanpuinaah he thu hi Chief Minister chuan a sawi a. Chief Minister chuan graduate thar te a lawmpui thu sawiin hah tak leh rim taka an lo zir te chuan ram leh mipuite rawngbawl nan an hmang thei ta tih a sawi a. Mahni inphata midang tana inpeknain kaihhruai tlat se a duh thu sawiin, an awmna apiangah malsawmna ni zel turin zirlai pass thar te chu a chah a ni.

Chief Minister chuan RIPANS chu Mizoram mai ni lo, India ram huap pawha Paramedical Science zirna changlung leh tha a nih thu leh Mizoramin he zirna in a nei chu vanneihthlak a tih thu a sawi a. Zirna in tha leh changlung tak an kalpui avangin RIPANS thawktute chungah lawmthu a hrilh a. Mizoram mai ni lovin India hmarchhak state ten an tangkaipui em em a ni a ti.

He hunah hian B.Sc Nursing degree mi 39 in an la a, 1st Semester zirlai thar tur mi 53, India hmarchhak state pariat leh Jammu & Kashmir atanga kal khawm te lawmluh an ni bawk.

<><><>

LESDE

Mizoram-a ITI pathum – Aizawl, Lunglei leh Siaha tih changlungna tura thawhhona Labour, Employment, Skill Development & Entrepreneurship (LESDE) Dept leh Schneider Electric India Foundation (SEIF) ten vawiin khan an ziaak a.

Minister Pu Lalnghinglova Hmar hovin MINECO, Aizawl-ah thawhhona thuthlung hi ziah a ni a, LESDE Department leh SEIF te thawhdunna turah hian Mizoram-a ITI pathum – Aizawl, Lunglei leh Siaha – a electrical, solar leh Industry automation course zirna tur laboratory changlung tak din a ni ang a. Laboratory din leh tihmasawn na’na sum mamawh chu SEIF in a tum dawn a

ni. Hei bakah hian heng course zirtirtu tur ITI a thawk (instructor) te tan SEIF in training buatsaih a ni ang a, ITI zirlaite tan entrepreneurship training leh awareness session buatsaih thin a ni bawk ang a. Bengaluru-a SEIF Entrepreneurship Incubation Centre-ah ITI zirlai tam zawk an intuaihriam theihna'n an thawkdun dawn bawk a ni.

He thutkhawmah hian Mizoram-a Industrial Training Institute (ITI) te tihchangtlun dan tur leh, skill development leh entrepreneurship-a Mizo thalaite hmasawna tur chungchang sawiho a ni a. Mizoram ITI pathum-a laboratory changtlung tak din tura thawhdunna tur chu vawiin vek khan ziah nghal a ni.

<><><>

## COMMERCE & INDUSTRIES

Commerce & Industries Minister Pu F. Rodingliana chuan Mizoram sawrkar chu hmasawna kalpui turin a inpeih thawkhat tawh a ti.

Vawiina State Handloom Expo - Hathkargha Mela, Champhaia a hawnnah Minister chuan he thu hi a sawi a. Minister chuan Mizoram sawrkar chu hmasawna kalpui turin a inpeih thawkhat tawh a, mipui lam pawh inpeih chho zel turin a ngen tih a sawi a. Ban a Kaih Policy hmangin mipuite khaichhuah sawrkarin a tum mek thu leh mipui thawhpuina tha tak an hmuh chuan Mizoram chu khaichhuah theih a beisei thu a sawi bawk a ni.

He hunah hian Adviser to Chief Minister Pu H. Ginzalala pawhin thu sawiin ZOHANCO chu Mizo culture vawn him zelna tura a kila lung pawimawh tak a nih thu leh mitinin an hriat deuh deuh a ngaih thu a sawi a. ZOHANCO Chairman Pu Lalliansawta pawhin thu sawiin Mizote chu kut themthiamna lamah theihna sang tak nei an nih thu a sawi a, handloom leh handicraft lam hchu hnam angin Mizoten an bawh nasa lo a, heng thilte hi hnam symbol ni thei tur khawpa siam turin ZOHANCO-in a buaipui mek a ni a ti. Hathkargha Mela ah hian stall 44 a awm a, tun thla ni 29 thleng neih a ni dawn a ni.

<><><>

## SHC CONGRESS CAMPAIGN

Congress party chuan Nov ni 5-a Sinlung Hills Council inthlan neih tur atan Campaign beihpui an thlak tan a,

MPCC President Pu Lal Thanzara chuan he inthlanah hian Congress party a chak chuan Congress party leh HPC(D) nena an inrem tawh in Sakawrdai ah ngei headquarter bunin hma an la dawn a ti a, an fund neih ang ang te hmang tangkaiin Sawkawrdai leh a chhehvel khaten pawisa lengvak vel chuan nitin khawsak pawh a tihziaawm an beisei a ti.

HPC(D) nena inremna chu Congress sawrkar hmalakna a ni, tih sawiin Pu Lal Thanzara chuan MNF sawrlar laiin HPC(D) te nen an inbiaa, a hlawhtlinna hmel hmuhtur a awm lo a, amaherawh chu Congress sawrkar khan remna leh muanna a ngai pawimawh a, theihtawp a chhuahna azarah inremna kha a lo awm thei a ni, ati.

ZPM hotuten kum 30 dawn lai sawrkarna lo chang tawh Congress party engmah ti lo anga an sawi chuan thangthar thil hre pha lo te ngaihtuahna a ti buai a, amaherawhchu Mizorama hmasawna hnathawh za a sawmkua chu Pu Lal Thanhawla kaihruai Congress sawrkar hnathawh ani, a ti.

ZPM chu mipuiin an enchhin mek laiin Centralah pawh an thurualpui leh an kungpui MLA pahnih nei BJP chuan an enchhin ve mek a, BJP MLA te dinhmun leh chanvo hi engtin nge an chinfel dawn an thlir mek a ni, a ti.

<><><>

UNION CABINET HIKED DA

Prime Minister Narendra Modia hova Union Cabinet thukhawm chuan central hnuai sawkar hnathawh leh pensioner-te DA chu zaa pathumin a tipung. Union Information and Broadcasting Minister Ashwini Vaishnaw chuan hemi chungchang hi vawiin khan New Delhi-a chanchinbumite a kawmnaah sawiin DA pung hi central sawrkar hnathawh mi 49 leh pensioner mi nuai 64 chuangan an chhawr dawn a ni a ti.

(Byte)

Pu Vaishnaw sawidanin Union Cabinet thukhawm chuan kum 2025-26 marketing season chhungin Minimum Support Price (MSO) chu tihpun a remti baw a. Sawrkar laipui chuan Varanasi-Pandit Deen Dayal Upadhyaya multi-tracking project hnuai Ganga lui chungah lei siamna tur a pawm baw a. He project atan hian cheng vaibelchhe sang 2 leh 642 ruahman a ni a ti.

<><><>

J&K CM

National Conference Leader Omar Abdullah chu vawiin khan Jammu and Kashmir Union Territory Chief Minister hmasa ber atan lakluh a ni. Jammu & Kashmir Lieutenant Governor Manoj Sinha chuan Chief Minister hi rinawmna thu tiamtirin a lalut a, a rual hian Council of Minister te lakluh tel an ni baw.

Vawiina Minister atana lakluhte hi Deputy Chief Minister atan National Conference hruaitu Surinder Chowdhary, Minister atan Javaid Rana, Javaid Dar leh independent candidate Satish Sharma te an ni a.

Chief Minister lakluh inkhawmah hian Congress president Mallikarjun Kharge, Leader of Opposition in Lok Sabha Rahul Gandhi, Samajwadi Party president Akhilesh Yadav, former CM of Jammu and Kashmir, Mehbooba Mufti leh INDIA bloc a an thawhpui party hruaitute an tel a ni.

<><><>